



*Minggu, 26 September 2021*  
**Ogen: Johanes 18:17-18**



**Tetap Rembak Ras Tuhan**



**W** *Habis manis sampah dibuang*” sada pribahasa sinuriken kekecewaan nandangi teman si lanai mediate, erkeleng ate entah pe mbuangken ia i bas paksa kesusahen. Situhuna i bas paksa susah e kel nge sipperluna kita teman tapi i je ka me itadingken teman kita. Tambah tindih kiniseran e, janah si sada ka kel siakap kita mabasa. Jesus sangana ngalaken perbeben si mberat; ipalidken kalak si la tuhu kerna diriNa, ngaloken ukumen i bas pemerentahen e me kematen i kayu persilang. Megi si enda kerina ajar-ajarNa si ras IA sedekah enda pe marpar merap nadingken IA. Mbiar ajar-ajar e adi ieteh kalak maka ia ajar-ajar Jesus. Situasi sulit enda erbahanca lupa kerina ajar-ajar kerna perbahanen-perbahanen dengen tanda-tanda sengget silakoken Jesus sedekah enda. Tempa-tempa Jesus e lanai erkuasa, janah masap kerina si enggo pernah silakokenNa. Itadingkenna me Jesus, ipersokenna Jesus e temanna. Guna nutupi si e kerina ilakokenna kai silakoken kalak sideban e me ras-ras cudu ngataken ia seri ras kalak sideban.

Senina Moria si kelengi i bas gelar Tuhanta Jesus Kristus, perbahanen ajar-ajar (secara khusus Petrus) enda mekatep sikataken teman si la setia. Tapi adi si ukuri terbagesen engkai maka e jadi, erkiteken buena tantangan dengen beratna perbeben geluh si man alanken Petrus i bas paksa si e. Saja, tundalkenna Jesus e la mereken keriahen man bana. Arah kejadiin e erlajar kita, maka i bas kerina kecibal geluh si mberat, situasi terjepit, melala perbeben ula tadingken Tuhan. Labo reh ulina geluhta adi nadingken Tuhan. Tetaplah rembak ras IA. Ingetlah i bas kerina situasi Jesus e tetap erkuasa nandangi kegeluhenta. Langa bo ker i keleng ate Dibata, kekelengenNa mbincar bagi mata wari pultak tep-tep erpagi-pagi. Emaka tetap deheri IA, ula lupaken IA janah gejakpenlah maka kuasaNa serta i bas kegeluhenta si la serta.